

MAULIDUR RASUL 1440H

الْحَمْدُ لِلَّهِ نَحْمَدُهُ وَنَسْتَعِينُهُ وَنَسْتَغْفِرُهُ. وَنَعُوذُ بِاللَّهِ مِنْ شُرُورِ أَنْفُسِنَا وَمِنْ

سَيِّئَاتِ أَعْمَالِنَا. مَنْ يَهْدِهِ اللَّهُ فَلَا مُضِلَّ لَهُ وَمَنْ يَضِلَّ فَلَا هَادِيَ لَهُ.

أَعُوذُ بِاللَّهِ مِنَ الشَّيْطَانِ الرَّجِيمِ

لَقَدْ جَاءَكُمْ رَسُولٌ مِّنْ أَنْفُسِكُمْ عَزِيزٌ عَلَيْهِ مَا عَنِتُّمْ حَرِيصٌ عَلَيْكُمْ

بِالْمُؤْمِنِينَ رَءُوفٌ رَّحِيمٌ ﴿١٢٨﴾

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا

مُحَمَّدًا عَبْدُهُ وَرَسُولُهُ. اَللّٰهُمَّ صَلِّ وَسَلِّمْ عَلٰى سَيِّدِنَا مُحَمَّدٍ وَعَلٰى آلِهِ

وَأَصْحَابِهِ أَجْمَعِينَ.

أَمَّا بَعْدُ،

فَيَا عِبَادَ اللَّهِ، اتَّقُوا اللَّهَ وَأَوْصِيكُمْ وَأَيَّيَ بَتَقْوَى اللَّهِ، فَقَدْ فَازَ الْمُتَّقُونَ.

Marilah kita bersama-sama meningkatkan ketakwaan kepada Allah *Subhanahu wa-Taala* dengan melaksanakan segala perintah dan meninggalkan segala larangan-Nya. Mudah-mudahan kita diberkati dan dirahmati Allah *Subhanahu wa-Taala* di dunia dan akhirat.

Sidang Jumaat yang dirahmati Allah *Subhanahu wa-Taala*,

Tibanya bulan Rabiul Awal mengingatkan kita kepada Nabi Muhammad Sallallahu Alaihi Wasallam. Jiwa yang merindui Baginda pastinya sangat gembira menantikan ketibaan bulan kelahiran insan yang mulia ini.

Sesungguhnya kehadiran Baginda merupakan suatu anugerah dan kurniaan Allah Subhanahu wa-Taala kepada umat manusia untuk menunjukkan jalan yang lurus dan benar. Firman Allah Subhanahu wa-Taala dalam surah al-Anbiya' ayat 107:

وَمَا أَرْسَلْنَاكَ إِلَّا رَحْمَةً لِّلْعَالَمِينَ ﴿١٠٧﴾

Yang bermaksud: “Dan tiadalah Kami mengutuskan engkau (wahai Muhammad), melainkan untuk menjadi rahmat bagi sekalian alam.”

Allah Subhanahu wa-Taala mengutus Rasulullah Sallallahu Alaihi Wasallam bagi menunjukkan cara hidup berakidah, bersyariat dan berakhlak mengikut al-Quran. Sesungguhnya matlamat kehidupan manusia untuk mendapatkan keredaan Allah Subhanahu wa-Taala dengan mengikut sunnah Rasulullah Sallallahu Alaihi Wasallam. Ini dijelaskan oleh Allah Subhanahu wa-Taala melalui firman-Nya dalam surah al-Ahzab ayat 21;

لَقَدْ كَانَ لَكُمْ فِي رَسُولِ اللَّهِ أُسْوَةٌ حَسَنَةٌ لِّمَن كَانَ يَرْجُوا اللَّهَ وَالْيَوْمَ الْآخِرَ

وَذَكَرَ اللَّهَ كَثِيرًا ﴿٢١﴾

Yang bermaksud: “Sesungguhnya pada diri Rasulullah itu adalah contoh ikutan yang baik (untuk diamalkan) bagi sesiapa yang berharap untuk bertemu Allah dan hari akhirat (dalam keredaan-Nya) serta banyak berzikir kepada Allah.”

Rasulullah Sallallahu Alaihi Wasallam juga bersabda dalam hadis yang diriwayatkan oleh Imam Bukhari dan Imam Muslim yang bermaksud “Aku tinggalkan kepada kamu dua perkara yang tidak akan menyesatkan kamu selama-lamanya selagi mana kamu berpegang dengan kedua-duanya iaitu kitab Allah dan Sunnah Rasul-Nya.”

Sidang Jumaat yang dirahmati Allah Subhanahu wa-Taala,

Apa yang membimbangkan kita, terdapat umat Islam hari ini mendakwa mereka mencintai Nabi Sallallahu Alaihi Wasallam tetapi amalan dan tindakan mereka bertentangan dengan ajaran yang dibawa oleh Baginda Sallallahu Alaihi Wasallam seperti mereka mengatakan bahawa menutup aurat tidak sesuai lagi pada zaman ini dan menyifatkannya sebagai suatu yang lapuk serta bercanggah dengan hak asasi individu.

Lebih dahsyat daripada itu, terdapat umat Islam yang rapuh imannya terpengaruh dengan fahaman liberal yang mengutamakan kebebasan akal dan nafsu mereka daripada mengamalkan sunnah Nabi Sallallahu Alaihi Wasallam. Mereka mempromosikan hak asasi manusia yang keterlaluan, hak persamaan jantina, hak kebebasan individu, dengan matlamat untuk mencapai keharmonian dan kebahagiaan yang hakiki. Apa yang nyata mereka mahu manusia seluruhnya hidup sebebaskan-bebasnya tanpa pegangan agama. Pada mereka seolah-olah akal adalah lebih tinggi daripada wahyu Ilahi dan ajaran para rasul yang perlu diikuti. Ketahuilah, seandainya manusia menolak panduan yang ditunjukkan oleh Rasul, sebaliknya hanya bergantung kepada akal dan nafsu semata-mata, pasti mereka itu terpesong daripada agama dan binasa.

Sidang Jumaat yang dirahmati Allah *Subhanahu wa-Taala*,

Marilah kita bersama-sama meningkatkan ilmu pengetahuan dengan membaca sirah Rasulullah Sallallahu Alaihi Wasallam sehingga kita benar-benar mengenal dan mencintai Baginda dan ahli keluarganya. Antaranya memperbanyakkan berselawat ke atas junjungan Nabi Muhammad Sallallahu Alaihi Wasallam sepertimana sabda Nabi dalam hadis yang diriwayatkan oleh Imam al-Nasaie:

مَنْ صَلَّى عَلَيَّ صَلَاةً وَاحِدَةً صَلَّى اللَّهُ عَلَيْهِ عَشْرَ صَلَوَاتٍ

Yang bermaksud: "Barangsiapa yang berselawat ke atasku dengan sekali selawat, maka Allah Subhanahu wa-Taala akan berselawat ke atasnya dengan sepuluh kali selawat."

Rasulullah bersabda lagi dalam hadis yang diriwayatkan oleh Imam al-Tirmizi:

أَوْلَى النَّاسِ بِي يَوْمَ الْقِيَامَةِ أَكْثَرُهُمْ عَلَيَّ صَلَاةً

Yang bermaksud: "Manusia yang paling utama bagiku pada hari kiamat nanti ialah mereka yang paling banyak berselawat ke atasku."

Dengan itu, marilah kita bersama-sama memperbanyakkan berselawat ke atas Baginda Sallallahu Alaihi Wasallam sehingga hati kita benar-benar mengasihi Rasulullah Sallallahu Alaihi Wasallam, ahli keluarga dan para Sahabat Baginda.

أَعُوذُ بِاللَّهِ مِنَ الشَّيْطَانِ الرَّجِيمِ

قُلْ إِنْ كُنْتُمْ تُحِبُّونَ اللَّهَ فَاتَّبِعُونِي يُحْبِبْكُمُ اللَّهُ وَيَغْفِرْ لَكُمْ ذُنُوبَكُمْ وَاللَّهُ غَفُورٌ رَحِيمٌ ﴿٣١﴾

Yang bermaksud: Katakanlah (Wahai Muhammad): "Jika benar kamu mengasihi Allah maka ikutilah daku, nescaya Allah mengasihi kamu serta mengampunkan dosa-dosa kamu. dan (ingatlah), Allah Maha Pengampun, lagi Maha Mengasihani.

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ وَنَفَعَنِي وَإِيَّاكُمْ بِمَا فِيهِ مِنَ الْآيَاتِ وَالذِّكْرِ الْحَكِيمِ وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ الْعَلِيمُ. أَقُولُ قَوْلِي هَذَا وَأَسْتَغْفِرُوا اللَّهَ الْعَظِيمَ لِي وَلَكُمْ وَلِسَائِرِ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.